



Na osnovu člana 17. stav (1) i člana 44. stav (1) Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61b. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24, 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sudija Velimir Ninković i sudija Sanela Gorušanović - Butigan, potpredsjednici Vijeća, sudija Izo Tankić, sutkinja Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, tužilac Saša Sarajlić, sutkinja Ljiljana Bošnjak – Glizijan, prof. dr. Džamna Vranić, advokatica mr. Duška Bogojević, advokat dr. sc. Davor Martinović, tužiteljica Željka Fabić i advokatica Elma Veleđar Arifagić, na sjednici održanoj 19. i 20.03.2025. godine, donijelo je

R J E Š E N J E

o imenovanju predsjednika Općinskog suda u Bugojnu

- I. Za predsjednika Općinskog suda u Bugojnu imenuje se **Hadžibegović - Haračić Randžana**, na mandat od četiri (4) godine.
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena pozicija predsjednika Općinskog suda u Bugojnu.

Nakon provedene konkursne procedure, nadležno podvijeće je u skladu sa članom 61b. stav. (2) Poslovnika VSTV-a BiH za predsjednika Općinskog suda u Bugojnu predložilo kandidate na rang listi pod rednim brojem 1 i 2 sa liste uspješnih kandidata, i to Hadžibegović - Haračić Randžanu i Soldo Katicu, koji na sjednici Vijeća izlažu program rada koji su ranije dostavili i izložili komisiji za obavljanje razgovora.

U skladu sa članom 61b. st. (3), (4) i (5) Poslovnika VSTV-a BiH, nadležno podvijeće dostavilo je Vijeću obrazložene prijedloge za kandidatkinje sa rang liste pod rednim br. 1 i 2, sa bodovima koje su kandidatkinje ostvarile u konkursnoj proceduri i njihovim programom rada, te rang listu kandidata.

Nakon izlaganja prijedloga podvijeća, predložene kandidatkinje su na sjednici Vijeća, u skladu sa članom 61b. st. (6) i (7) Poslovnika VSTV-a BiH, izložile svoj program rada, prema redoslijedu koji su ostvarili na rang listi.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, te na osnovu uspjeha postignutog u konkursnoj proceduri i izlaganja programa rada, Vijeće je primjenjujući odredbe člana 61b.

st. (8), (9) i (10) Poslovnika VSTV-a BiH, odlučilo da za predsjednika Općinskog suda u Bugojnu imenuje kandidatkinju na rang listi pod rednim brojem 1 Hadžibegović - Haračić Randžanu, koja od 01.07.2012. godine obavlja dužnost predsjednika tog suda.

Vijeće je nakon ocjene stručnosti kandidatkinje, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci, rukovodne vještine i iskustvo, sposobnost upravljanja ljudskim potencijalima i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 91,8 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 26,5 bodova od mogućih 30 bodova, što ju je u konačnici rangiralo na prvom mjestu rang liste kandidata sa ukupno ostvarenih 118,3 bodova od mogućih 130 bodova.

Kriteriji stručnosti i sposobnosti pravne analize imenovane kandidatkinje, koja je nosilac pravosudne funkcije, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 4 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 4,3. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 4,3 dodijeljen je ekvivalentan broj bodova koji se koristi u konkursnoj proceduri od 91,8 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodnih vještina i iskustva, te sposobnosti upravljanja ljudskim potencijalima utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54b., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 26,5 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (2) tačka a) Poslovnika VSTV-a BiH stekla uvjete za predlaganje i imenovanje na poziciju predsjednika općinskog suda, Vijeće je vodilo računa o okolnostima koje su relevantne za procjenu podobnosti iz člana 48a. Poslovnika VSTV-a BiH, ocijenivši da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Imenovanje navedene kandidatkinje, pored uspjeha postignutog u konkursnoj proceduri i izlaganja programa rada, opredjelila je i činjenica da je ista, obavljajući u prethodna tri mandata dužnost predsjednika Općinskog suda u Bugojnu, pokazala visok stepen vještine rukovođenja i organizovanja rada, kao i sposobnost upravljanja ljudskim potencijalima. Prethodno imenovanju na poziciju predsjednika navedenog suda imenovana kandidatkinja je u periodu od 1998. g. do 2012. g. obavljala dužnost sudije Općinskog suda u Bugojnu, a u periodu od 1993. g. do 1998. g. obavljala je dužnost zamjenika glavnog tužilaštva u Općinskom javnom tužilaštvu u Bugojnu.

Kroz izlaganje programa rada za mandatni period koji je kandidatkinja dostavila u toku konkursne procedure i izložila tokom obavljenog razgovora pred nadležnom komisijom Vijeća, kao i na sjednici

Vijeća, kandidatkinja je detaljno obrazložila strateške ciljeve, te ciljane rezultate i predložene mjere, kojima kroz pravovremeno donošenje određenih odluka i nadzorom nad radom sudija i ostalih zaposlenika, namjerava unaprijediti i osigurati zakonito i efikasno rukovođenje sudom. Cijeneći sve navedeno, Vijeće smatra da će imenovana kandidatkinja uspješno, stručno i savjesno odgovoriti obavezama i dužnostima koje nosi navedena rukovodna funkcija.

Uzimajući u obzir navedeno, Vijeće je ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju predsjednika Općinskog suda u Bugojnu.

Kandidatkinja se na dužnost predsjednika suda, u skladu sa članom 28. stav (2) Zakona o VSTV-u BiH imenuje na mandat od 4 (četiri) godine.

U pogledu dijela rješenja o stupanju na dužnost imenovanog, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Uputa o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-1188-1/2025
Datum: 20.03.2025. godine



